

Jí² 'lái² 'wii²¹² 'e gasii¹in San Pedro tíi²i 'in jai² líi² Jesucristo

Sii¹in Tú³ 'e jí² lo tya' 'in taain²¹² lí xiia²¹

1 1 Jna-a, Tú³, 'in líi¹i apóstol tya' Jesucristo, síi³na 'e jí² lo. Síi³na 'e jí² lo tya' jileei²¹, 'in gatyii¹³in Dios 'in taain²¹² lí xiia²¹, 'in taain²¹² la caain²¹ lí sii²¹ Ponto, Galacia, Capadocia, Asia coon¹³ Bitinia. 2 Síi³na tya' 'in nigatyii¹³in Dios Jmii²¹ jiin¹³ la niga'i¹-tsi la mo jéi¹. Joon niga'i¹-tsi Dios 'e jmée¹i 'naa' tsá² tya'a cwáain¹ tya' Espíritu tya'a 'e linúu¹³uun' joon 'e untyúui¹ 'naa' coon¹³ jmi¹ 'øø¹i Jesucristo. Cwocwo²gi Dios 'naa' fo² feei¹ tyii' joon 'e seen²¹naa' tyú²-u.

'In jai² líi² Cristo 'i¹-tsi icwaa¹ coon¹³ 'ii fu ñu¹fú²

3 Cwocwoo²¹o' 'maai¹³ Dios Jmii²¹, 'ii Jmii²¹ Ña¹ñu¹u' Jesucristo. Joon tsu 'wii¹³ feei¹-tsi tyi' áai¹ gacwoo¹o 'e galiseen²¹na' tún¹ 'e sijaan²¹an' 'e tyú² mo gajmaa¹a jiin¹ Jesucristo jee²¹² 'lii²¹². **4** Joon coon¹³ la joon 'ii¹³moo' coon²¹ tyíia³ 'e jo tyéi¹ tyii' 'e niga'maa¹ Dios tyii' fu ñu¹fú². Joon 'e tyíia³ do jo lí² li'leei²¹ jon'gi lí tsáai². **5** Si'mo²o tya' jileei²¹ 'naa' 'in un'øøi¹ Dios tsu 'wii¹³ ja²mo líi²naa'. Iun'øøi¹ Dios 'naa' ca mi 'ii¹³naa' 'e tiin¹³naa'. Nanáa¹ tyú² joon i'ee¹ Dios mi tí² jiin²¹ lí tséi¹.

6 'Wii¹³ joon jmaa²aa' jløø¹³naa' xufiin¹³ moo²oo' wúu¹ coon²¹ sii¹³ coon¹³ 'lái² nii² faí³. **7** Joon 'e faí³ 'e seen²¹naa' nano lí la lí coon²¹ jí² 'e untyú² tsá² cwanáa¹ coon¹³. Joon 'e jai² 'e líi²naa' tyiin²gi lagi cwanáa¹ 'e tyéi¹. Pe coon¹³ 'e faí³ do iuntyú² Dios jilaa²¹ 'e jai² líi²naa'. Joon mi cwo'íi¹naa' tyú²-u jilaa²¹ 'e faí³ do 'in Jesucristo, mi jó¹ tún¹, icwo²o 'naa' 'e tyú¹-unaa'. Joon 'ii¹³naa' 'e 'ya²gi tya'a joon iun'goo²¹o tsá² 'naa' la un'goo²¹o tsá² 'ii.

8 Fiin¹³ jo mo ñii² 'naa' Jesucristo 'iin²¹²moo' 'ii joon jløø¹³moo' 'e jiin¹³ jo ñí²ii' xiiala foo²oo' jløø¹³moo'. Joon róøi² jilaa²¹ 'e jløø¹³naa' líi²naa' 'e 'ya²gi 'e sá² ñu¹fú². **9** Joon jløø¹³naa' tsu 'wii¹³ 'ii¹³naa' 'e tiin¹³naa' 'wii¹³ galijai² galíi²naa'.

10 Joon 'in tsá² 'in gacwo¹ júu³ tyú² tya' Dios ca líi²¹² gafaa²¹o tya' xiiala itiin¹³naa' Dios. Joon gacwo²-tsi 'ido untsáa¹a joon gamii¹i xiiala ilí². **11** Ga'naa²¹i 'iin tsá² si 'ee jiin²¹ 'ee 'e faa²¹a 'in Espíritu tya' Cristo mo gajmaa¹a júu³ 'e 'ná¹ nii²¹² Cristo wúu¹ joon i'ii²¹i 'e 'ya²gi tya'a. **12** Pe Dios gajma²a júu³ 'in tsá² do 'e jon'on tya' 'ii 'e júu³ do pe tyijna'o'. Joon 'in cwo¹ júu³ tyú² nano coon¹³ 'ii²¹ tya' Espíritu Tyú² 'in Dios gasii¹in fu ñu¹fú², 'ii-i jma²a 'naa' júu³ 'e cwáain¹ do. Joon 'in ángeles 'iin²¹²in 'ái¹ litsáai¹-tsi 'e cwáain¹ do.

Gatø¹ø Dios 'e seen²¹ tyú¹-u mo 'in jai² líi² 'ii

13 'Wii¹³ joon tyaa¹aa' tyú² tyii', 'í¹du-'oo'. Coon²¹ tún² seen²¹naa'. Cwoli²¹oo'. Cwoli¹øø³moo' jilaa²¹ fo'fee¹-tsi i'ii¹³naa' mi jnéi¹ Jesucristo. **14** Jmaa²aa' la jmoo¹o xuui²¹² 'in nũ¹³. Jon'on seen²¹naa' jmaa²aa' jilaa²¹ 'e gó² 'ii²¹²naa' la gajmaa²aa' la nũ'gi ilicwii¹naa' Dios. **15** Pe seen²¹naa' la seen²¹ 'in nigatø² 'naa'. Joon tyú¹mo 'ii coonti. **16** Tsu ni jí² tya'a 'e jin²: "Cwoli'ee¹moo' jilaa²¹ 'e gó² tsu jna 'aa¹oo jilaa²¹ 'e gó²."

17 Joon 'ná¹-a ngii²ii' tsa'goo²¹-'oo' la 'ii²¹² taan²¹²naa' juncwii²¹ lo wana foo²oo' Dios: "Nũ¹u", tsu 'ii jmoo¹o 'ii²¹ røø² tya' tsá² la jaain²¹ la jaain²¹ tsá². **18** Ñí² 'naa' 'e Dios gatyí² 'e láa²moo' jee²¹² coon²¹ juncwii²¹ 'e jo 'e to² 'í³in 'e gacwo¹ tsacøøi¹³ tyi'naa'. Joon jo gatyí¹ coon¹³ jilaa²¹ 'e tyéi¹ 'e la lí² cwataa²¹ si cwanáa¹ 'ee. **19** Gatyii²¹o coon¹³ jmi¹ 'øø¹i Cristo 'e tyiin² 'áai¹. Gatuun²¹ jmi¹ 'øøi¹ la tuun²¹ jmi¹ 'øøi¹ jaain²¹ joo'saa²¹ xuui²¹² 'e jo 'ee líi¹i coonti 'e cwoo¹ tsá² lawa coon²¹ fa¹. **20** Nigasí²mo Dios røø² coon¹³ Jesucristo 'ee ijmáa¹a coon¹³ Jesucristo la nũ'gi ijmáa¹a juncwii²¹ joon 'wii²¹² tyi'naa' gajmaa¹a liñí² 'naa' jee²¹² jiin²¹ li tséi¹. **21** Coon¹³ jilaa²¹ 'e gajmaa¹a Cristo jo cu²gi-'oo' coon¹³ Dios tsu Dios do gajmaa¹a jiin¹ 'ido jee²¹² 'lii²¹² joon gacwoo²¹ jilaa²¹ 'e 'ya²gi tya'a 'e jo cu²-'oo' coon¹³ on coon¹³ jilaa²¹ 'e jai² líi²naa' coon¹³ jilaa²¹ 'e sijaan²aan' 'e cwo²o jna'.

22 Joon tsu 'wii¹³ niganũ²ũun' 'e júu³ jai² tya' Dios nigalityú¹naa' 'e li'iin²¹²naa' 'in tsaru¹u' la jai² cwoli'iin²¹²naa' la jaain²¹ la jaan²¹naa' ce caain²¹-'oo' 'e gauntyú¹ Dios. **23** Galiseen²¹naa' tún² 'ii²¹ tya' júu³ tyú² tya' Dios 'e li la lí² jún² 'e jo tyéi¹ nii¹³. Galiseen²¹naa' tún² 'ii²¹ tya' Dios jon' tya' sáa³ jmii²¹ tsá² 'in júin¹. Joon coon¹³ júu³ tyú² tya' Dios do cwoo¹o Dios juncwii²¹ tyii' joon 'e juncwii²¹ do jo tyéi¹. **24** La gajin² jí² do:

Jileei²¹ tsá² líi¹i la líi¹i ñii²¹,

joon jilaa²¹ 'ya²gi tya'a li la lí³ tya' ñii²¹ do.

Lityũun²¹ ñii²¹ do joon xũu²¹ lí³ tya'a.

25 Pe júu³ tya' Ña'ñũ¹u' taa²¹a coon²¹ tøø²mo.

Joon nigacwo¹ tsá² 'naa' 'e júu³ tyú² do tya' xiiala jmaa¹ Dios tiin¹³naa'.

2 **1** 'Wii¹³ joon tú¹ 'naa' jilaa²¹ nii² tsii²¹² wúu¹ 'naa' 'e líi²naa' joon jo cón² 'naa' tsá² too², jo cwoliin²naa' tajuu²¹ joon jo suun²¹naa' 'e sá² tya' tsá² xeei²¹. Tú¹ 'naa' jilaa²¹ júu³ 'atsaa²¹. **2** La líi¹i yũun²¹ 'in 'iin²¹²in cuu²¹ tũu²¹ 'e lí² cwaain²¹ coon¹³ la joon joon 'naa' cwoli'iin²¹²moo' 'e júu³ tya' Dios 'e jo lí² caai²¹ 'e coon¹³ la joon 'e li ñí³gi' xiiala itiin¹³naa' Dios. **3** Tsu nigalitsáa¹mo-'oo' 'e la ja²mo jmoo¹o Ña'ñũ¹u' tyú² tyii'.

Líi¹i Cristo lawa coon²¹ cuun²¹² 'e jiin¹in

4 Ñityéen¹naa' jon coon¹³ Ña'ñu¹u' Jesús icwo² 'naa' juncwii²¹ tyii'. 'Ii líi¹i lawa coon²¹ cuun²¹² 'e nigapii²¹ tsá² co' lawa 'e jo tseein²¹. Pe tyani Dios líi¹i lawa coon²¹ cuun²¹² 'e gatyii¹²i joon 'áa¹mo tyiin². 5 Joon 'naa' cwolí²naa' lawa cuun²¹² 'e jiin¹ 'e lí²-i jmaa¹³a Dios coon²¹ cwo¹ li cwaa²¹ 'in Espíritu Tyú² tya'a. Joon coon¹³ la joon liseein²¹ coon²¹ poo²¹² untsá² 'in jmoo¹o jiin¹³ to² tyu² Dios Jmii²¹. 'Ii²¹ tya' Jesucristo cwo¹ 'ido fa¹ joon jiin¹³ 'ii-o lí² cwo² Dios fa¹ jiin¹³ 'e lí² 'ii²¹in Dios. Joon 'e fa¹ do lawa'a 'e faa²¹o jilaa²¹ júu³ tyú² coon¹³ jilaa²¹ to² tyu² 'e jmoo²oo'. 6 Tsu ni jí² tyú² tya'a Dios 'e jin²:

Jna-a isáa¹³na fuu²¹ Sión jaain²¹ tsá² 'in nityii¹³na ilíin² lawa coon²¹ cuun²¹² tyú² 'e toon²¹ tsá² nifu mo jmoo¹²o 'nú¹.

Joon tyiin²mo 'ii.

Joon jilee²¹ 'in jai² líi² 'ii jo 'e i'oo¹o fa'ii²¹ tya'a, pe iun'goo²¹ tsá² 'ii. 7 Tsu joon tya' jileei²¹ 'naa' 'in jai² líi² 'ii 'áa¹mo 'yei²gi 'ii tyii', pe tya' jilee²¹ 'in jo jai² líi² 'ii pe li lí¹ 'ii²¹ tyu²o to² la mo ngóo¹ 'naa¹³mo. Ingíi²mo 'ii jmáa¹ la lí² 'e jin² ni jí²:

'E cuun²¹² 'e gapí² 'in tsá² jmoo¹³ 'nú¹ li co² jo 'ee to² 'íi³in joon galíi¹mo la li 'e cuun²¹² nifu.

8 Galí² jiin¹³ la gajin² 'e jí² do:

Ilí² lawa cuun²¹² 'e tyuun¹³ tsá² 'e jmoo¹o cii¹³ tsá².

Cii¹³mo 'in tsá² do tsu jo jmoo¹o nuu¹²un júu³ tya' Dios. Tsu la joon gatyú² Dios to² itsangíi² jileei²¹ 'in jo nuu¹³.

Xiiala líi¹i 'in gatyii¹³in Dios

9 Pe 'naa', Dios gatyii¹³in 'naa' 'e líi¹naa' tsá² tya'a. Gatyii¹³in 'naa' 'e líi¹naa' coon²¹ poo²¹² untsá² 'in jmoo¹o jiin¹³ la to² tyu² Dios. Líi¹naa' tsá² tya' Dios 'in lí² jmáa¹³aa' tsá² júu³ jilaa²¹ 'e 'ya²gi tya' Dios 'in nigatø¹ 'naa' 'e 'woo²¹naa' li nuu²¹ 'e cwotaan²¹²naa' li jná² joo²¹ tya'a.

10 'Naa', la mo jéei¹ jo 'ee fuu²¹ li goo²oo' pe nano líi¹naa' lawa'a tsagoo¹o 'in tyu² Dios to². La mo jéei¹ jo mo galí² 'e 'ii¹³naa' fo'fee¹ tya' Dios pe nano niga'ii¹³mo.

Xiiala 'ná¹ jmoo¹o 'in jai² líi² Dios

11 Tsaru¹u' 'in 'iin²¹²na, líi¹naa' tsá² coon²¹ fuu²¹ 'in cwá² juncwii²¹ lo cata. Mí³ii tyaní²ii' cwoján¹ caai²¹ jilaa²¹ 'e gó² 'e 'iin²¹²in tsá² jmáa¹a tsu jilaa²¹ 'e 'iin²¹²in tsá² jmaa¹a ixé¹mo alma tya' tsá². 12 Ngíi²ii' 'e tyú² coon²¹ tøø²mo tyani 'in jo cwii¹in Dios tsu wa mo faa²¹a 'ido 'laa²¹ tyii' 'e líi¹naa' tsá² gó² inii²¹o jilaa²¹ tyú² 'e gajmaa¹aa' joon ifaa²¹a tyú² tya' Dios mi ti jmi²¹² ifee²¹i Dios 'ii.

13 Cwojmaa²aa' núu¹³uun' 'in 'oo¹o to² 'e jo lí² faa²¹a tsá² 'laa²¹ tya' Ña'ñu¹u'. Cwojmaa²aa' núu¹³uun' to² tyu² 'in tsaa'to² tyii' 'in fee¹gi si

jmoo²¹ joon jaain²¹ tsá² 'oo¹o to² 'ee 14 'in tsaa'to² do gasii²in i'e¹e wúu¹ jileei²¹ 'in jmoo¹o 'e gó² joon tyaa¹-tsi jileei²¹ 'in jmoo¹o 'e tyú².

15 'In²¹²mo Dios 'e coon¹³ jilaa²¹ tyú² 'e jmoo²oo' ilí² jmoo²oo' ján¹ tii² jileei²¹ 'in tuuin²¹² jo 'øøi²¹-tsi.

16 Ngii²ⁱⁱ lawa tsá² 'in galáai² Jesús, 'in jo 'ná¹-a jmá¹ jilaa²¹ tiisi² tya' tsá² pe jo jmaa²aa' 'e gó² joon mi yuui¹³ joon foo²oo': "Jmoo²o' jiin¹³ to² tyú² Dios tsu naláa²mo jna'." Jmaa²aa' la tii² jmá¹ tsá² 'in tyú² Dios to². 17 Un'goo²¹oo' jileei²¹ tsá². Cwoli'iin²¹²mo' jilee²¹ tsá² 'in jai² líi² Cristo. Cwoli'gøø²¹mo' Dios, joon un'goo²¹oo' 'in tsaa'to² nifu.

'E¹e Cristo jna' xiiala jmoo²¹o' taa²¹ mi moo²¹o' wúu¹

18 'Naa', tsá² jmoo¹o to² inuu tsá², cwojmaa²aa' núu¹³uun' to² tyú² ñifi¹ii' coon²¹ tún² 'e tsáai¹-'oo'. Cwojmaa²aa' núu¹³uun' 'in tyú¹ la joon jon 'in soo¹-tsi. 19 'Yaai¹-tsi Dios tya' tsá² 'in nii²¹² wúu¹ 'e jo tii² jo 'nii²¹-tsi tsu 'iin²¹²in jmáa¹ la 'iin²¹²in Dios. 20 Pe wana jmoo¹o tsá² 'e gó² joon 'e²e tsá² 'ii wúu¹ tya' 'e gó² gajmaa¹a, ¿'ee to² 'íi³in wa nii²¹² wúu¹ joon jo 'nii²¹-tsi? Pe wana gajmaa¹a tsá² coon²¹ 'e tyú²-u joon jo 'nii²¹-tsi mo 'e²e tsá² 'ii wúu¹ tya' 'e tyú² gajmaa¹a, 'yaai¹-tsi Dios tya'a. 21 Tsu 'wii¹³ joon gatø¹ø Dios 'naa' tsu Cristo gajmaa¹a lawa coon²¹ li² tyii' mo ganii²¹² wúu¹ 'wii²¹² tyii' 'e 'ná¹-a jmaa²aa' la gajmaa¹a. 22 Jiin¹³ coon²¹ tsaa² jo ga'noo¹o, jon'gi jiin¹³ jaain²¹ tsá² jo gacon²on too². 23 Joon mo gajíi²in tsá² 'ii jo gañii¹in jiin¹³xu. Joon mo ga'e²e tsá² 'ii wúu¹ jo gaton¹on fo¹-tsi 'in tsá² 'in ga'e²e 'ii wúu¹ pe 'e 'íi¹³ la 'e ñii¹i gatyaa¹a cwoo²¹o Dios jilaa²¹ tsu Dios 'in jmoo¹o 'ii²¹ røø²¹. 24 Cristo mo gateein¹ tsá² 'ii tsaa' crúu¹³ ña'o gatyí¹ tsaa² tyi' coon¹³ wúu¹ 'e ganii²¹ do. Joon gajmaa¹a la joon 'e jo tyú²gi tsaa² jna' to² pe 'e ilisáan³an' 'e tyú². Tsu naláa²mo' coon¹³ jilaa²¹ wúu¹ 'e ganii²¹. 25 Tsu galíi¹naa' lawa joo'saa²¹ 'in nigatuui¹ pe nano nigacii¹³oo' tya' 'in 'aai²¹ 'naa', tya' 'in un'øøi¹ 'naa' 'e itiin¹³naa'.

Xiiala 'ná¹ jmá¹ 'in nicui² cwoo²¹o

3 1 Coon¹³ la joon jon 'naa', tsamí² 'in seein²¹ nuu¹ tya'a, 'ná¹-a jmaa²aa' núu¹³uun' 'e coon¹³ la joon wa seein²¹ 'inlíi¹³ nuu¹ tyii' 'in jo jo¹ líi² júu³ tya' Dios jo 'ná¹ foo²oo' pe jiin¹³ coon¹³ 'e tyú² jmaa²aa' ilítsaa¹mo-tsi 'in ñuu¹ tyii' do. 2 Ñuu¹ tyii' icoon²¹ cwáain¹ xiiala ngii²ⁱⁱ coon²¹ tún² joongi xiiala un'goo²¹oo'. 3 Jo cu¹²-'oo' coon¹³ jilaa²¹ 'e jmaa²aa' 'e 'yei²gi' lagi xiiala tyá² tsamí² tyú² tyí¹i coon¹³ jilaa²¹ cwanáa¹ joongi coon¹³ 'mi² 'e tyí² tsá² 'ee. 4 Pe cwoseen²¹naa' coon²¹ tún² 'e tyú¹naa' li tsi, 'e seen²¹naa' wo²-'oo' joongi jo cu¹²-'oo' tsu jo tyéi¹ jilaa²¹ 'elo. Joon tyani Dios 'áa¹mo tyiin² 'e seein²¹ tsá² la joon. 5 Tsu la joon líi¹i 'in tsamí² 'in seein²¹ cali², 'in líi¹i tsamí² tya' tsacøøi¹³ tyi', gatsaa¹-tsi Dios joon gajmaa¹a nuu¹²un to² tyú² ñuu¹ tya'a 'e jméi¹ 'ña'a 'yei²gi. 6 La joon gajmaa¹a Sara, gajmaa¹a nuu¹²un ñuu¹ tya'a

Abraham, joon gajin² Sara: “Ñũu¹ tyiia no.” Joon lín²naa' jamí¹i Sara wa'a jmoo¹oo' 'e tyú² joon jo jmaa²aa' 'goo²¹-'oo'.

7 La joon jon 'naa' tsá² seein²¹ tsamí² tya'a, cwotaan²¹²naa' coon¹³ tsamí² tyii' lawa 'in 'øøi²¹-tsi. Tsáa¹mo-'oo' tsamí² tyii' jiin¹³ la gatíi². Tsáa¹-'oo' 'ido jon'on wa' 'wii¹³ 'e tsaai¹³ gi lagi 'naa' pe tsu 'wii¹³ niga'ii²¹i fo'feei¹ tya' Dios la ga'ii¹³naa'. Joon coon¹³ la joon jo sijniíi¹³ júu³ tyú² tyii'.

Xiiala 'ná¹ jmá¹ 'in nii²¹ wúu¹

8 Coon²¹gi júu³ fuu²¹²uu 'naa' jileei²¹ 'naa'. Canii²mo 'i¹-'oo' la jaain²¹ la jaan²¹naa'. Fúu² cwolín²naa' ruu²¹naa' la jaain²¹ la jaan²¹naa'. Cwo'iin²¹²moo' tsá² xeei²¹ lawa tsaruu²¹moo'. Cwoseen²¹naa' wo²-'oo' la joongi tsá² jo jmoo¹o feei¹ 'ña'a. 9 Jo jmaa²aa' 'e gó² tya' tsá² 'in jmoo¹o 'e gó² tyii', la joon jon jo jii²¹²naa' tsá² 'in jii²in 'naa'. Li' cii¹²i jmaa¹aa' la jmaa¹a 'ido. Mí²ii' tyani Dios 'wii²¹² tya'a joongi foo²oo' 'e tyú² tya'a, tsu Dios gatø¹ø 'naa' 'e 'ii¹³ 'naa' jilaa²¹ 'e tyú² tya'a. 10 Jin² jí² tya'a:

Jileei²¹ 'in 'iin²¹²in liseein²¹ 'yaai¹-tsi coon¹³ juncwii²¹ tya'a,
joon táa¹i tyú²-u la coon²¹ jmii²¹²;

'ná¹-a cwoun'øø¹²i sii¹²i 'e jo cwofaa²¹ 'e gó²,
la joon jon loosii²¹²i 'e jo cwoo²¹ faa²¹a júu³ tajuu²¹.

11 'Ná¹-a cwotuu²¹ jilaa²¹ 'e gó²,
joon cwocwo²-tsi 'e seein²¹ tyú² coon¹³ jileei²¹ tsá².
Joon cwocwo²gi-tsi.

12 Tsu un'øø²¹i Ña'nũ¹u 'in tsá² tyúi¹,
joon nuu¹o júu³ tyú² tya' 'in tsá² tyúi¹ do,
pe 'nii²¹-tsio tya' jileei²¹ 'in jmoo¹o 'e gó².

13 Jo 'in seein²¹ jiin¹³ jaain²¹ 'in lí² jmeei²¹ 'naa' wa cwo²-'oo' jmoo²oo' 'e tyú². 14 Tsu xufiin¹³ 'e² tsá² 'naa' wúu¹ tya' 'e tyú² gajmaa²aa' jløø¹³moo'. Jo foo¹³moo' coon¹³ jilaa²¹ fo² toon²¹-'oo', jo cu²-'oo' líi²naa'. 15 Caai¹ jeen¹³naa' jilaa²¹ 'e gó² tsu Jesucristo jo 'ee to² sá² jmeei¹ 'e gó² joon nanaa²¹ tyú² tyii' jmáa¹³aa' tsá² júu³ jileei²¹ tsá² 'in 'iin²¹²in linii²¹ 'e lí¹ 'e ijeen²naa' Jesucristo. Jo foo²oo' coon¹³ júu³ jløø¹³ pe sii¹³naa' coon¹³ 'e un'goo²¹oo' Dios Jmii²¹. 16 Cwoñí²ii' 'e jmai² 'e tyú²-u 'e nigajmaa²aa' 'e 'áa¹a fa'ii²¹ jileei²¹ 'in faa²¹a 'e gó² tyii' lawa tsá² gó²; 'in faa²¹a júu³ tajuu²¹ tya' 'e tyú² jmoo²oo' 'e líi¹naa' tsá² tya' Cristo. 17 Tsu tyú²gi tyii' wa'a 'iin²¹²in Dios la joon 'e moo²oo' wúu¹ tya' 'e tyú² gajmaa²aa' lagi ñí²ii' wúu¹ tya' coon²¹ 'e gó² 'e nigajmaa²aa'.

18 La joon galí² tya' Cristo mo gajúin¹ gatyii¹ tya' tsaa² tya' tsá² coonti. In tsá² tyúi¹ do gajúun²in 'wii²¹² tya' tsá² gó² 'e lí² 'ii²¹ Dios jna'. Gajnga²mo tsá² ngú¹ taan¹in pe gajiiin¹o tún¹ 'ii²¹ tya' Espíritu Tyú² tya' Dios Jmii²¹. 19 Joon alma tya'o ngacwoo¹ júu³ tya' Dios tya' 'in alma tya' tsá² 'in taai²¹² sijniíi¹³. 20 'Ii calii jo mo gajmaa¹a nũu¹³un la 'ii²¹² gajmaa¹a Noé 'e barco tya'a. Jee²¹² jiin²¹ joon fee¹mo-tsi Dios tya'a. Pe

coon¹³ barco do xuu gatiin¹³ coon¹³ jmi²¹ do, tí² jiin¹³ jñeei². **21** La joon jon jna' mo sáa¹na' jmi²¹ nano lawa'a 'e tiin¹³mo' coon¹³ jmi²¹ do. Mo saai²¹ tsá² jmi²¹ 'e jmi²¹ do jon'on wa' jan¹² 'la² toon²¹ caluu pe lawa coon²¹ li² 'e nigami¹² 'in tsá² do Dios 'e unsíi² Dios 'e gó² 'e 'i¹-tsi 'wii²¹² nigajiin¹ Jesucristo. **22** Joon 'in Jesucristo do naganga¹²mo fu ñu'fú² joon gacwoo²¹ li' caai¹ Dios Jmi²¹ li tsáa¹. Joon 'ii-o tyu^{2u} to² jileei²¹ ángeles coon¹³ jileei²¹ 'in 'oo¹o to² coon¹³ jilee²¹ 'in tyu² to².

Jmoo^{2oo} to² tyii' coon¹³ waa²¹ pí² 'e nicwoo¹ Dios Jmi²¹

4 **1** 'Wii¹³ joon, la mo ganí³ Cristo wúu¹ 'wii²¹² tyii' coon¹³ moo¹ táa¹i, la joon jon 'naa' 'ná¹ náa¹ tyú² tyii' moo^{2oo} wúu¹. Tsu jileei²¹ 'in niganí³ wúu¹ coon¹³ moo¹ táa¹i nigatuu²¹o jilaa²¹ tsaa². **2** Joon taan²¹²mo jon la tøøi² 'e seein²¹ jiin¹³ la 'yaai¹-tsi Dios joon jo 'iin²¹²gi jmáa¹a jilaa²¹ 'e nigatyuu¹³ Dios 'e la jmoo¹ tsá² catyaai² seein²¹ juncwii²¹. **3** Tsu lín²mo jiin¹³ la nagajmaa^{2aa} la mo jéei¹ 'e jmaa^{2aa} la tí²-tsi tsá² jmoo¹o 'in jo cwii¹in Dios. Tsu 'ii yunfi¹i jmáa¹a jilaa²¹ 'e gó². Suun¹in jilaa²¹ 'e gó², ngi¹ to² 'ín¹, tí²-tsi tsáa¹a li náa¹ jmi²¹² 'un¹²un máa¹. Joon un'goo²¹o tsá² jileei²¹ dioses 'in jo jai¹² 'e jo tñii². **4** Joon tsa'goo²¹-tsi 'áai¹ 'in tsá² do mo jo sicaan²¹naa' coon¹³ 'e jmaa^{2aa} 'e gó² do coon¹³on. Joon faa²¹a 'laa²¹ tyii'. **5** Pe 'in tsá² do ingí¹ coon²¹ tya'a tyani 'in niganáa¹ tyú² tya'a ijmáa¹a 'ii²¹ tya' 'in jiin¹ lagi 'in najúuin². **6** Tsu 'wii¹³ joon ganúu^{2un} 'in tsá² najúuin² júu³ tya' Dios 'e xufiin¹³ najuun²¹mo ngú¹ taan¹in la júuin² jileei²¹ tsá², joon jiin¹o tún¹ 'ii²¹ tya' Espíritu Tyú² tya' Dios. Coon¹³ la joon jiin¹ coon²¹ tøø²mo la jiin¹ Dios.

7 Nijatyéen¹mo 'ii²¹ tya' jilaa²¹ 'e sá², 'wii¹³ joon cwongii²ⁱⁱ coon²¹ tún² 'e cwo¹²-oo' foo^{2oo} júu³ tyú². **8** Joon tyiin^{2gi} la jee²¹² jilaa²¹ jo tú² 'naa' 'e 'iin²¹²naa' la jaain²¹ la jaan²¹naa' tsu coon¹³ la joon fee¹mo-tsi' tya' 'e 'láa²mo tsaa² tya' tsá² xeei²¹. **9** 'Ii¹³naa' tsá² xeei²¹ inuu tyii' 'yaai¹-oo'. **10** Joon la joon la jaain²¹ la jaan²¹naa' uncoon¹³ ruu²¹naa' jiin¹³ la 'ii²¹ tya' Dios 'e gacwo¹ Dios la jaain²¹ la jaain²¹. Cwoli²naa' lawa 'in náa¹ ni 'in tyúi¹ tya' jilaa²¹ nii² 'e tyú²-u cwo¹²o Dios tsá². **11** Mo cwoo¹ tsá² júu³ tyú², cwo faa²¹ lawa jaain²¹ 'in faa²¹ júu³ tyú² tya' Dios. Joon wana unjiin² tsá² tsá² xeei²¹ cwojmaa¹a coon¹³ 'ii²¹ 'e cwo¹ Dios 'ii. Tsu coon¹³ la joon jilaa²¹ 'e jmaa^{2aa} 'ii²¹ tya' Jesucristo ijmáa¹a feei¹gi Dios. Joon tñi²mo Cristo jilaa²¹ 'ya¹²gi coon¹³ jilaa²¹ to² coon²¹ tøø²mo. Amén.

'In jai¹² líii² Cristo 'ná¹ nii²¹ wúu¹ coon²¹ ce tún²

12 Tsaru^{1u} 'in 'iin²¹²na, mo moo^{2oo} wúu¹ Dios jøøi² du 'naa' wana taa²¹-oo', 'wii¹³ joon 'i¹-oo' wa'a 'e tsa'goo²¹-oo' áai¹. **13** Li' jmaa^{2aa} jløø¹³ moo' tsu coon¹³ la joon moo^{2oo} coon²¹ sii¹³ wúu¹ la ganí² Cristo wúu¹. La joon jon ijmáa^{2aa} jløø¹³ moo' áai¹ mi jne¹i 'e 'ya¹²gi tya' Cristo.

14 Wana faa²¹ tsá² 'laa²¹ tyii¹ 'wii¹³ jo¹o líi²naa' Cristo, tsá² jløø¹³mo 'naa' tsu 'in Espíritu Tyú² tya' Dios 'in ngi¹ coon¹³ 'naa'. Joon 'in 'yei²gi 'áa¹mo 'ii la 'yei²gi Dios Jmii²¹ 'ña'o. 'In tsá² do faa²¹ 'laa' tya' 'in Espíritu Tyú² do pe 'naa' un'goo²¹oo' 'i. Joon jo 'iin²¹²na wa'a moo²oo' 'naa' wúu¹ jiin¹³ jaan²¹naa' coon¹³ 'e gó² nijmaa²aa'. **15** Tsu 'wii¹³ joon 'iin²¹²na 'e jo jngaa¹²naa' tsá², jon'gi jmaa²aa' 'uun²¹, jon'gi 'noo²oo' mii¹³, jon'gi jmaa²aa' doñi'ee 'e gó². **16** Pe wana ní³ tsá² wúu¹ tsu 'wii¹³ jo¹o líi² Cristo jo cwo'aa¹ a fa'i²¹, pe cwo¹o 'maai¹³ Dios tsu tsá² tya' Cristo 'ii.

17 Tsu gati² jiin²¹ 'e 'lää² 'wii²¹² jmáa¹ a Dios 'ii²¹. Joon i'lää² 'wii²¹² coon¹³ 'in jai² líi² 'ii. Joon wa i'lää² 'wii²¹² coon¹³ jna' 'in jai² líi² 'ii, ÷'ee ilí² coon¹³ 'in 'in jo mo galinuu¹²un júu³ tyú² tya' Dios? **18** Wa coon²¹xu-u itiin¹³ 'in tsá² tyú¹ tyani Dios, 'ee ilí² coon¹³ 'in tsá² 'in jo tsaa¹-tsi Dios joon 'noo¹o tsaa². **19** Tsu 'wii¹³ joon jileei²¹ 'in ní³ wúu¹ la gali'iin²¹²in Dios 'ná¹-a jmaa²gi 'e tyú² la ngóo¹ 'naai¹³ joon tyaa²¹ a cwoo²¹o Dios alma tya'a. Dios gajmee¹ 'ii joon jo cuu²¹ i Dios júu³ tya'a.

Cwoo¹ Tú³ cwáain¹ 'in jai² líi² Jesucristo

5 1 Tsu joon 'ii³ii júu³ tya' tsacøøi¹³ jee²¹² 'naa' joon jna-a jon jaain²¹ jee²¹² 'ii. Joon gamóo³-oo mo gangóo¹ Cristo wúu¹ joon sicaan²¹na coon¹³on 'e 'ii¹³na'a 'e 'ya²gi tya'a 'e tí² li jnéi¹. **2-3** 'ii³ jna júu³ 'e 'áa¹naa' 'in tsá² do 'in jai² líi² Dios 'in líi²naa' tsacøøi¹³ tya'a lawa 'in 'áai¹ joo'saa²¹. 'Ii¹³naa' to² 'yaa¹-oo' tsu la joon 'iin²¹²in Dios. 'Ii¹³naa' to² do jon'on wa'a jnaa²aa' cuu² pe ce caain²¹-oo'. Jo tyuu²uu¹ 'i to² 'ii²¹ 'in líi¹ tsá² tyii' pe jmaa²aa' lawa coon²¹ li² tyú² tyaní¹i. **4** Joon mi jnéi¹ 'in tyu² to² nifu i'ii¹³naa' coon²¹ corona 'ya²gi 'e jo lifin¹³ la li corona lí¹ mo¹³.

5 La joon jileei²¹ 'in xuui²¹²gi cwo'tyaa¹ yá² júu³ tya' tsacøøi¹³. Joon 'ná¹ ungoo²oo' tsaruu²¹naa' la jaain²¹ la jaan²¹naa' joon uncoon¹³oo', tsu jin² ni jí² tya' Dios:

'Nii²¹-tsi Dios coon¹³ 'in jmoo¹o jløø¹³ yaai,
pe uncoon¹³o 'in 'wéi¹.

6 Cwói¹ yaanaa' 'e tyu² Dios to² 'naa' tsu 'gøø¹³mo 'áai¹ 'ii joon la joon mi tí² jiin²¹ tya'a ijméei¹ 'naa' tsafeei¹. **7** Tyaa²aa' cwoo²¹o Dios jilaa²¹ 'e ifee¹naa' tsu 'ii-o cu²-tsi 'wii²¹² tyii'.

8 Cwongí²ii' coon²¹ tún², li² jmaa²aa' tsu 'in 'lii¹³ 'naa²¹i tsá² 'e 'iin²¹²in untyée¹mo. 'lin²¹²in jmáa¹ a 'e 'iin²mo-tsi tsá² Jesucristo. Joon lawa 'yiaa¹tíi³ 'in ngi¹ to² 'oo¹o, la joon jon 'in 'lii¹³ ngi¹ 'naa²¹i 'in tsá² do.

9 Tíi¹moo' coon¹³on, taa²¹ jmaa²aa' coon¹³ jilaa²¹ 'e jai² líi²naa'. Cwoliñí²ii' 'e jileei²¹ 'in jai² líi² la caain²¹ juncwii²¹ nii²¹ wúu¹ la joon.

10 Pe mi li ciin²¹ 'e niganii²¹ wúu¹ coon²¹ sii¹³ Dios 'ña'a ijmée¹i 'naa' 'múui². Ijmée¹i 'naa' 'e tá² taain²¹²-oo' joon icwo² 'naa' pí². Joon seen²¹naa' tá² coon¹³ 'e jai² líi²naa'. Joon Dios do cwo¹ 'naa' jilaa²¹ fo'fee¹ joon 'ii do gatø¹ø 'naa' coon¹³ 'e gajmaa¹ a Cristo tyii' 'e 'ii¹³naa'

'e 'ya'²gi tya'a 'e jo tyéi¹. **11** Cwoli'² tya'a jilaa'²¹ 'e 'ya'²gi joongi jilaa'²¹ 'ii'²¹ coon²¹ tøø²mo. Amén.

Júu³ li tséi¹

12 'In tsaru'¹u' sii²¹ Silvano gatoon²¹² júu³ 'e jí² lo. Joon cwáain¹ tyiia 'ii jaain²¹ tsá² 'in tsáa¹-tsi. Coon¹³ 'e jí²xu lo gamí³ii tyaní²ii' joon jmóo³oo 'naa' júu³ 'e faa'²¹ 'e jí²xu lo la jai'² xiiala 'iin²¹²in Dios tsá². Tá² téein²-oo' 'e júu³ lo.

13 'In tsá² catyaai² 'in jai'² líii² Cristo 'in taain²¹² Babilonia lo, 'in gatyii¹³in Dios jon, sii¹i 'aa²¹²moo'. La joon jon jin'² Marcos 'in líii¹ lawa yuun²¹ tyiia. **14** Fee¹³naa' ruu'²¹naa' la jaain²¹ la jaan²¹naa' coon¹³ coon²¹ 'e tyú²-u.

Cwoseen²¹naa' tyú² jileei²¹ 'naa' 'in jai'² líii² Cristo. Amén.